



partii naleraq

17. oktoberi 2016

UKA2016/107

**Ilaqutarittut inuunermut iluaqutaanerusumik sulisoqarnermut politikkeqalernissaq anguniarlugu Naalakkersuisut UPA2017-mut iliuusissanik nassuiaasiornissamik peqquneqarnissaannik Inatsisartut aaliangiiffigisassaattut siunnersuut.**

(Inatsisartunut ilaasortaq Sara Olsvig, Inuit Ataqatigiit)

Inatsisartunut ilasortaq Sara Olsvig Inuit ataqatigiit piumasaqarluni siunnersuuteqarpoq tassalu ilaqutariittut inuunermut iluaqutaanerusumik sulisoqarnermut politikkeqalernissaq anguniarlugu iliuusissanik Naalakkersuisut saqqummiusseqqullugit UPA2017-mut imatullu oqaaseqassaagut.

Nunarput tamaat ataatsimut isigalugu inuiaqatigiinni ingerlalluarnissarput pingaartorujussuusoq oqaatigissavarput, tassami ukiuni makkunani inuuniarnikkut atukkatsigut assigiinngissut alliartuinnarpoq, tamannalu aamma qanoq iliuseqarfigisariaqalerparput.

Atukkagummi inuttut assigiissarneqanngippata ilungersunartumut killikkiartuinnartussaavugut. Allaammi ilaqutariippassuit inigisaminniit aniatitaasarneri annertusiartuinnartoq takujuannalerparput, taamatullu ingerlaaseqariartuinnarneq akuersaarneqarsinnaanngilaq tamakkulu sukumiisumik sulissutigalugit aallartitariaqarput.

Kiisalu nunatsinni suliffissaaleqineq annertuumik atuukkaluartoq suliassat annertusiffiini sulisussanik amigaateqartarnerput tusartuarterparput misigalugulu tamannalu ilungersunarluinnartut tigullugu ingerlaaserput piumasaqaatillu ilanngullugit eqqartortariaqalerpagut.

Ilaqutariit inuunermut pitsaanerusumik atugaqalernissaat anguniarlugu nassuiaasiornissamik Naalakkersuisunut piumasaqarneq tamakkiisumik taperserparput. Tassami ukiuni makkunani inuttut ajornartorsiutit annertusiartuinnarfiini qanoq iliortoqartariaqalerpoq taamaattumik inuttut atukkat pitsaanerulernissaanut aallaaviusussanik sulisoqartariaqalerpoq.

Nunatsinni ilaqutariit ingerlalluarnissaat tamatta maani kissaatigigipput nalunanngilluinnarpoq, pingaartumik ilaqutariit meerartallit eqqarsaatigalugit. Tassami ullumikkut ilaqutariinnut meerartalinnut atugassarititaasut assigiinngitsorujussuupput, tamannalu ilanngullugu aamma eqqartuiffigeqatigiissutigisariaqarparput.

Meeqquerivinni meeqqat inissinneqartartut aamma assigiinngitsumik angajoqqaat aningaasarsiaat aallaavigalugit akilersuisitsisarneq ilumut tulluarnersoq aamma apeqqusertariaqalerparput. Tassami assigiimmik paarineqarput taamaattumik aamma taanna aaqqissuussineq ilaqutariinnut meerartalinnut tamanut naapertuutumik nuannaarutissanngorlugu aaqqittariaqalerpoq.

Taakkuinnaanngillat aamma meeqqat tapisiaat assigiimmik meeqqanut tutsinneqartariaqalerput. Ilaqutariinnut tamanut meerartaqarneq

nuannaarutinngortinneqartariaqarpoq. Aammalu meeraqarnissaq ilaqutariinnut pilerinartunngorlugu aaqqissuutariaqarparput, tassami siunissami sulisinnaasut piginnassagutsigit meeqqiornerusariaqarpugut.

Meeqqanut tapisiat ilumut tulluarnepoq aamma qaammatikkaartumik tunniunneqartuannarnissaat, qaammatit pingasukkaarlugit tunniunneqartarallarmata meeqqat atisassarsinissaannut naammattaraluartut qaammatikkalermata annikilleqaat atisanut pisinissamut amigarujussualernikummata tamannalu eqqarsaatissatut apuukkusupparput.

Ullumikkut inuuniarnikkut atukkat akitsoriartuinnarfiini aammalu ineqarnikkut akit qaffasereertigisut ilaqutariit arlalinnik meerartallit assorujussuaq ilungersortarput tassami assersuutigalugu 280.000.-kruunit sinnerlugit aningaasarsisimagaanni meeqqanut tapit peerneqartarput tamannalu ilaqutariinnut akunnattumik isertitallit isigigaanni assorujussuaq inuuniarnermikkut ajornartorsiulertarput.

Ilaqutariit meerartallit ineqarnerminnut tapissutinik pitsaanagerusunik atugaqarnissaat ilanngullugu eqqarsaatigisariaqarparput. Meerartaqarneq nanertuutinngortinnagu nuannaarutissanngortariaqarpoq naammaginartumik atugaqarnissaat qulakkeerlugu.

Anaanat ataatat kisimiittut meerallit assorujussuaq aamma inuuniarnikkut ajornartorsiuteqartarput, allaat ilaat meeqqamik atugaasa pitsaanagerunissaat anguniarlugu sulerujussuuartariaqartarput meeqqaminnut piffissaarullutik, ilaqutariitut ingerlaniassagaanni pissutsit aamma tamakku akuersaanginnarneqarsinnaanngillat, angajoqqaanut kisimiittunut atugassarititaasut ilanngullugit qulajaqqissaartariaqarput.

Taamatut oqaaseqarluta Naalakkersuisut allanngutissatut siunnersutaat tassalu ukiakkut 2017-mut saqqumiussaqarnissaminnut saqqummiussaat taperserparput. Isumaqaratta qulaajagassat ilaqutariinut tunngasut pitsaasumik suliarineqassappata upernaakkut 2017-mut siusippallaartoq.

Hans Enoksen